

Allannguutissatut siunnersuut

uunga

**Uunga siunnersuut: Erngup nukingata innaallagissiornermut atorneqartarnera pillugu Inatsisartut inatsisaat nr. x, x. [qaammat] 2014-imeersoq**

Naalackersuisunit aappassaanerinninnissamut saqqummiunneqartoq.

Paragraffi nutaaq

**1. § 11**-ip kingorna *kapitali 3*-imi paragraffitut nutaatut ilanngunneqassaaq:

”§ **01.** § 11, imm. 4 malillugu Namminersorlutik Oqartussanut pisinnaatitsissummik pigisaqartup akiliuteqarnissaanut aalajangersaanermut ataqatigiissillugu, pisinnaatitsissummik pigisaqartoq suliaqarnermut akuersissummi pineqartumut ilaasumut akileraaruteqartitsinnginnissamik nalunaarfigineqarsinnaavoq.

*Imm. 2.* Imm. 1 malillugu akileraaruteqartitsinnginnissamut akuersinissaq sioqqullugu, § 4, imm. 3 malillugu akuersissummut tunniunneqarsimasumut piffissaliussamut, aningaasanut inatsimmi oqaasertaliussamik ilanngussinikkut Naalackersuisut piginnaatinneqassapput.”

Allannguutissatut siunnersuummut nassuiaatit

**Nassuiaatit nalinginnaasut**

Inatsisissatut siunnersuutip siunertaanut pingaarnermut, tassaasumut erngup nukinga atorlugu suliassani aammalu tassunga atasumik suliffissuaqarnikkut suliaqarnermut, inuussutissarsiortut aningaasaliisarnissaannik siuarsaanissaq, naapertuunnerulersitsiniarlutik allannguutissatut siunnersuut manna Naalackersuisut saqqummiukkusuppaat.

Aalajangiiffigisassatut siunnersuummi imm. 113/UKA2012-imi aalajangiisoqarpoq erngup nukinganut inatsimmi akileraaruteqartitsisannginnissamut ilusiliamik ilanngussisoqassasoq. Alcoa Inc.-imut aluminiuliorfissamut suliassaq pillugu isumaqatiginninniarnerni immikkoortut pingaarnertit ilaat tassaavoq, akuersissummi erngup nukinganut inatsit malillugu tunniunneqarsimasumi ingerlatseqatigiiffiup akileraaruteqartinneqartarnissaanut taarsiullugu akiliummik aalajangersaanissamut periarfissaqassasoq. Periarfissaq taamaattoq aatsitassanut ikummatissanullu inatsit naapertorlugu akuersissutini atuuppoq.

-----  
UPA 2014/139

APN Suliap nr. 2014-095698

Aalajangersagaq siunnersuutigineqartoq malillugu, inatsimmi § 11, imm. 4 malillugu akiliummik aalajangersaasoqaraangat, pisinnaatitsissummik pigisaqartoq suliaqarnermut akuersissummi pineqartumut ilaasumut akileraaruteqartannginnissamik nalunaarfigineqarsinnaavoq.

Aalajangersagaq atugassarititaasunik tunngavissarititaasunillu aalajangersaaneq, isumannaallisaanermik, peqqinnissamik, avatangiisinik, isumalluutininik atuineramik aamma inuiaqatigiinni piujuartitsinissamik mianerinninnissamut tunngasuusinnaasoq, aallaavigalugu tamakkiisumik isiginnittumik oqartussaasut suliarinninnerannik atuisarneq pillugu inatsisissatut siunnersuummi § 1 imm. 2-imut ataqatigiissuuvoq.

Allannguutissatut siunnersuutip atuutilernerani Naalakkersuisut pisuni aalajangersimasuni pisinnaatitsissummik pigisaqartup akiliummik aalajangersaanermut atatillugu akileraaruteqartannginnissaa aalajangiussinnaavaat. Aalajangersagaq aamma inatsisissatut siunnersuummi § 10 imm. 2-imi aalajangersakkamut ataqatigiissillugu isigineqassaaq, taanna malillugu ingerlatseqatigiiffimmuut erngup nukinganik atuisussamut aammalu tassunga atasumik inuussutissarsiorluni suliffissuaqarnermik suliaqartussamut akuersissummik tunniussisoqarsinnaalluni.

Aalajangersagaq siunnersuutigineqartoq Danmarkimi aamma Kalaallit Nunaanni inatsisini aalajangersakkat allat arlallit imarisaannut naapertuuttunngorlugu oqaasertalerneqarpoq. Taamaalilluni aalajangersagaq siusinnerusukkat danskit Kalaallit Nunaannut aatsitassanut ikummatissanullu inatsisaannit 1978-imeersumi § 20, imm. 3-imi uniffik siulliup imarisaanut aamma siusinnerusukkat danskit aatsitassanut ikummatissanullu inatsisaanni 1991-imeersumi § 8 imm. 3-imut kiisalu Kalaallit Nunaanni aatsitassanut ikummatissanullu inatsimmi atuuttumi § 17 imm. 3-imi aalajangersakkamut tunngaviusunut, naapertuuppoq.

Danskit aatsitassanut ikummatissanullu inatsisaanni 1991-imeersumi § 8, imm. 3-imi aalajangersagaq, 2009-imi Kalaallit Nunaata namminersulerneranut atatillugu pissutsit assigiinngitsut pillugit inatsisikkut allannguuteqartinneqarpoq. Aatsitassanut ikummatissanullu inatsimmi § 8 imm. 3-ip allannguuteqartinneqarneranut siunertaavoq, § 8 imm. 3-ip namminersorneq pillugu inatsimmi pingaartumik §§ 7-imi aamma 8-imi aatsitassarsiornermi isertitat pillugit aalajangersakkanut naapertuuttunngortinnissaa. Aatsitassanut ikummatissanullu inatsimmi namminersorneq pillugu inatsimmi aatsitassarsiornermit isertitat pillugit aalajangersakkat pissutigalugit piumasqaataavoq, akiliut akileraaruteqartitsinerup nammakkersuinissaraluatuulli minnerpaamik nammakkersuitinneqassasoq. Aatsitassanut ikummatissanullu inatsimmi § 8 imm. 3-ip allannguuteqartinneqarnera, akileraaruteqartitsisannginnissamik nalunaaruteqarnissamut taarsiullugu akiliummik aalajangersaaneq inatsimmi tunngaviusumi § 43-imut naapertuunnersoq pillugu apeqqummut tunngassuteqanngilaq.

Aatsitassanut ikummatissanullu inatsimmi § 8 imm. 3-imi aalajangersagaq, aammalu allannguutissatut siunnersuummi aalajangersagaq maannakut siunnersuutigineqartoq, akileraaruteqartussaataanermik nalinginnaasumik allaffissornikkut maleruagassiinissamut Naalakkersuisunut ataatsimut isigalugu suliaakkiissuteqarnermik imaqqanngillat, kisiannili taamaallaat Naalakkersuisut pisuni aalajangersimasuni ataasiakkaani erngup nukingata innaallagissiornermut atorneqartarnera pillugu Inatsisartut inatsisaat malillugu akuersissutini tunniunneqarsimasuni akiliummik aalajangersaanermut atatillugu akileraaruteqartitsisannginnissamik akuersisarnissaannut inatsimmi tunngavissaliilluni.

Imm. 2-imi siunnersuutigineqartumi naatsorsuutigineqarpoq, pisuni ataasiakkaani tamaginni akileraaruteqartitsinnginnissamik nalunaaruteqarnissaq sioqqullugu Naalakkersuisunut aalajangersimasumik piginnaatitsisumik aningaasanut inatsimmi oqaasertaliussamik ilanngussisoqartassasoq.

### **Allannguutissatut siunnersuummi aalajangersakkanut ataasiakkaanut nassuiaatit**

Paragraffi siunnersuutigineqartoq nutaajuvoq.

Imm. 1-imut

Imm. 1-imi aalajangersagaq imarisamigut oqaasertamigullu Kalaallit Nunaanni aatsitassat pillugit inatsimmi nr. 335, 6. juni 1991-imeersumi siusinnerusukkat atuuttumi § 8 imm. 3-imi aalajangersakkamut assinguvoq. Inatsimmi 1991-imeersumi § 8 imm. 3-imi aalajangersakkami erngup nukinganit isumalluutinik misissuinissamut atuinissamullu akuersissummi akileraaruteqartitsinnginnissamik nalunaaruteqarnissamut, nukissiuuteqarnermut ministeri assingusumik piginnaatinneqarpoq.

Akileraaruteqartitsinnginnissamut piumasaqaataavoq, atuinissamut akuersissummi siunnersuummi § 11, imm. 4-imi aalajangersagaq malillugu akiliummik aalajangersaasoqassasoq. § 11, imm. 4-imi aalajangersakkami oqaasertaliusaaq "akiliummik akiliteqarnissaq", taamatuttaaq danskit nunap iluanut inatsisaanniippoq, tassuunalu erseqqissarneqarpoq akileraaruteqartitsinissaq pineqanngitsoq. § 11, imm. 4 malillugu ilanngullugu akuersissummi, pisinnaatitsissummik pigisaqartoq akiliummik erngup nukinganit isumalluutip akuersissummi pineqartunut ilaasup annertussusaa tunngavigalugu (annertussutsimut akiliut), erngup nukinganik isumalluummik atuneq aalajangersimasoq tunngavigalugu (atuinermut akiliut) imaluunniit nukissiaq tunisassiarineqartoq tunngavigalugu (tunisassiamut akiliut) akiliteqassasoq pillugu atugassarititaasunik aalajangersaasoqarsinnaavoq. Taamatuttaaq akuersissummi pineqartunut ilaasumik suliaqarnermi aningaasaqarnikkut iluanaarutit ilaannik (iluanaarutinit akiliut) Namminersorlutik Oqartussanut akiliteqartarnissaq pillugu atugassarititaasunik aalajangersaasoqarsinnaavoq.

Akileraaruteqartitsisannginnissaq Naalakkersuisut § 10, imm. 2 malillugu akuersissummik tunniussisimappata, suliaqarnermut, tassa imaappoq pisinnaatitsissummik pigisaqartup erngup

nukinganit isumalluutinik atuinera kiisalu tassunga atasumik inuussutissarsiornermi ingerlatarisinnaasai, tunngassuteqarsinnaavoq.

Aalajangersakkami erseqqissarneqarpoq akileraaruteqartitsisannginnissaq tamakkiisumik imaluunniit ilaannaasumik akileraaruteqartitsisannginnissatut nalunaarutigineqarsinnaasoq, ilanngullugu piffissamut aalajangersimasumut imaluunniit pissutsinut aalajangersimasunut tunngatillugu akileraaruteqartitsisannginnertut.

Imm. 2-imut

Imm. 1-imi aalajangersakkami piginnaatitsissummik atuinissamut piumasaqaataavoq, akileraaruteqartitsinnginnissamik nalunaaruteqarnissaq sioqqullugu, pisuni ataasiakkaani tamaginni aningaasanut inatsimmi oqaasertaliussamik ilanngussisoqassasoq. pisinnaatitsissummik pigisaqartumut akileraarusiinerup annertussusissaanik maleruagassiinissamut inatsisitigut aamma aalajangersimasumik inatsisini tunngavissaqarnissaq, aalajangersakkami qulakkeerneqarpoq. Naatsorsuutigineqarpoq erngup nukinganit isumalluutinik atuinissamut akuersissutit ikittuinnaassasut, taamaattumik pisut ikittuinnaat aalajangersimasullu, aningaasanut inatsimmi oqaasertaliussamik ilanngussinissamik qinnuteqaatigineqartassallutik.